

東
華
續
錄

東華續錄

同治九十六

臣王先謙敬編

臣張式恭恭校

同治十二年癸酉春正月辛巳朔元旦節停止筵宴 上詣 堂

子行禮○癸未諭內閣朕於三月初五日恭奉 慈安端裕皇太

后 慈禧端佑皇太后啟鑾初八日祇謁 東陵初九日節屆清

明朕恭詣 定陵行數土禮並詣 隆恩殿行大饗禮虔申孺慕

禮成後於十二日還宮所有典禮並一切事宜著各該衙門照例

敬謹豫備○諭軍機大臣等奎昌等奏追剿賊匪出境豫籌防剿

一摺官軍於上年十一月間在那瑪勒吉幹招地方遇賊接仗賊

即敗竄探聞該匪兩股每股五六百名一竄科布多迤西一路不

知何往一回竄肅州邊外之厄濟納河諾彥山一帶與該處踞匪

會合又聞該逆欲將所擄貨財販運於綏遠城庫倫多買槍藥圖在邊外肆擾肅州踞賊屢竄出關必須迅克肅州城方免蔓延爲患著左宗棠檄飭徐占彪會合金順兵勇奮力進剿剋期攻拔務將該逆醜類就地殲除毋任紛竄關外又成不了之局其厄濟納河諾彥山地方爲肅逆巢穴該大臣兵力此時能否兼顧並著酌度辦理奎昌等擬俟請調之官兵軍械到齊後騰出察哈爾馬隊令其移營察漢淖爾地方作爲追剿之兵隨時探明諾彥山等處賊勢相機攻剿卽著奎昌常順多布沁扎木楚志剛悉心商酌妥籌布置其竄往科城迪西一股究在何處滋擾著托倫布保英確切偵探派軍截剿盡殄賊氛並著定安張廷岳阿爾塔什達多派官兵於所屬境內認真盤查毋任賊匪潛行販運以杜詭謀奎昌等摺內所稱該匪黨內多有花勇係屬何項勇丁並著查明具奏

所有此次打仗出力官兵及在事各員准其擇尤保奏毋許冒濫

將此由六百里各諭令知之○丙戌以李宗義爲兩江總督並充

辦理通商事務大臣

前山西巡撫

○以張樹聲爲江蘇巡撫文彬爲漕

運總督李元華爲山東布政使長慶爲山東按察使

由充沂曹清道遷

○

戊子享太廟○辛卯祈穀於上帝○壬辰撥部庫銀二十萬

兩濟景廉軍餉○常恩以病免調廣壽爲刑部右侍郎以成林爲

理藩院右侍郎

由大理寺卿遷

○癸巳諭軍機大臣等奎昌等奏借地安

插棍噶扎勒參徒眾請將出力委員獎勵各摺片據稱棍噶扎勒

參徒眾回阿爾泰山耕牧奎昌等因該處係烏梁海蒙古牧地非

辦理清楚不能彼此相安令卽補佐領雅爾哈前往阿爾泰山會

同科布多委員與烏梁海兩翼散秩大臣妥爲籌辦該散秩大臣

等情願借地安插該呼圖克圖等亦皆樂從等語自是目前權宜

辦法惟安插徒眾究有若干棍噶扎勒參要求究係何事均未據一一聲敘著卽詳細奏聞奎昌見已起程回京卽著常順多布沁扎木楚志剛隨時妥爲駕馭毋任滋生事端該烏梁海地屬科布多著托倫布保英畱心察看先事防維毋稍疏忽並飭烏梁海兩翼散秩大臣等諭知該蒙古人眾各守本分務令永遠相安卽補佐領雅爾哈著仍以前保佐領軍功班次遇缺儘先卽補補缺後以協領儘先補用以示鼓勵將此由五百里各諭令知之○乙未諭內閣劉嶽昭曾璧光奏官軍會克新城老巢黔省上游肅清一摺貴州新城地方與雲南平彝等州縣接壤逆回金萬照等麇集其間爲患兩省經劉嶽昭等飭令雲貴各軍會合進剿疊將賊礮攻毀擒斬甚多上年十月初五日官兵會同直徧城下攻入南門將逆首金萬照等擒獲正法首要各逆悉數殲除當將新城克復

黔省上游一律肅清見在全省底定自應渥予恩施曾璧光著賞給頭品頂帶太子少保銜雲騎尉世職周達武著賞給騎都尉世職以獎勞動○諭軍機大臣等黔省新城逆回日久負隅此次該將領奮勇攻克將要逆悉數剪除上游一律肅清勦辦甚爲出力黔省變亂十有餘年見在地方新復一切善後事宜亟應妥爲經理著曾璧光等懷遵疊次諭旨悉心籌辦以期一勞永逸新城降眾二千餘人業經該撫等籌商安插仍著飭令地方官撫綏防範毋貽後患降目張忠誠著劉嶽昭隨時察看如再不知悛改卽行明正典刑不得稍事姑容該處逃亡人眾漸次復業曾璧光務慎選賢能守令盡心撫輯用副朝廷軫恤殘黎至意該兩省官軍應如何分別畱防撤回以資鎮壓並節餉需之處著劉嶽昭曾璧光周達武妥籌辦理將此由五百里諭知劉嶽昭曾璧光並傳諭周

達武知之○予貴州陣亡總兵官劉同升等祭葬世職○丙申允王文韶奏分別遣留湖南援黔各軍○戊戌諭軍機大臣等總理各國事務衙門奏請派員辦理日本國換約事宜一摺日本國通商條約上年經李鴻章與該國使臣會同議定茲該國使臣來津換約著派李鴻章將上年所立條約妥爲互換其條規二本卽由總理各國事務衙門發交李鴻章祇領照辦其覲奉國書一節著李鴻章於換約時體察情形妥慎酌辦將此諭令知之○己亥予甘肅被戕總兵官魏紀鑒祭葬世職○辛丑諭軍機大臣等前據左宗棠奏成祿糜餉遷延舉動乖張當經諭令穆圖善密查具奏旋據穆圖善覆稱成祿不知檢束參款俱屬有因本應治以應得之罪因念成祿業經出關所部乏人接統是以未經降旨本日復據左宗棠奏成祿前在高臺苛派捐輸迫士民赴營申訴復指爲

聚眾抗糧誣爲叛逆並將寄寓之權家園莊圍定掩捕殺斃二百餘人猶且虛報勝仗籲請獎敘等語是該提督喪心昧良情罪重大實難一日姑容金順前奏行抵涼州卽日督飭後隊赴肅此時計已馳抵肅州著卽酌帶所部兼程出關接統成祿各隊一面傳旨將成祿革職拏問卽日遴派員弁押解來京聽候治罪毋得稍涉遲延致有洩漏肅州軍務已諭令左宗棠責成徐占彪等迅速攻剿應否酌增勁旅卽由該督調派金順於拏問成祿派員押解起程後卽在安敦玉一帶扼要駐紮聽候諭旨該將軍所部各隊及分紮後路之軍應如何調赴前敵畱顧運道之處卽著金順斟酌軍情妥爲籌畫奏明辦理將此由六百里密諭知之○諭本日據左宗棠奏成祿在高臺時苛斂捐輸誣民爲逆縱兵冤斃多命所犯情節重大斷難一日姑容已密諭金順傳旨將成祿革職拏

問解京治罪矣關外距京寫遠解送務須嚴密除由金順派員押解外著左宗棠多派得力員弁沿途護解並飭經過地方官接續遞解前進不得稍涉疏虞前署高臺縣知縣管笙著左宗棠一併派員押解來京質證毋任成祿得以狡展至金順所部兵勇或調赴前敵或分紮後路軍糧軍火並檄飭地方官毋得稍分畛域肅毋令缺乏一切運送軍糧軍火並檄飭地方官毋得稍分畛域肅州軍務卽責成徐占彪等認真勦辦迅掃逆氛如須添撥兵勇卽著酌量調派以資得力所請將通判王佳植等免議生員李載寬等昭雪之處俟定案時一併降旨將此由六百里密諭知之○壬寅免直隸各屬同治六年以前民欠旗租○癸卯諭內閣朕奉慈安端裕皇太后 慈禧端佑皇太后懿旨三載考績爲國家激揚大典中外滿漢諸臣有能恪共職守勞勩最著者允宜特加甄

敘以示優眷茲當京察屆期吏部開單題請詳加披閱恭親王首
贊樞廷歷久不懈盡心輔政鉅細靡遺懋著勳勞深資倚任著交
宗人府從優議敘大學士文祥吏部尚書寶鋆兵部尚書沈桂芬
工部尚書李鴻藻和衷贊畫矢慎矢勤均著交部議敘大學士直
隸總督李鴻章盡心民事宣力彌勤陝甘總督左宗棠公忠謀國
艱鉅克膺均著交部從優議敘餘著照舊供職○添撥永定河修
防戰兵十名守兵九十名○張樹聲請將移撥南匯營之狼山鎮
中營守備一缺仍畱狼山管理錢糧事宜下部議允之○甲辰諭
內閣劉嶽昭岑毓英奏克復大理府城首逆伏誅全郡肅清一摺
逆首杜汶秀盤踞大理府城十有八載地險城堅負隅抗拒上年
五月間官軍攻克上下兩關賊勢漸蹙雲南巡撫岑毓英先將近
省及東南各郡次第廓清督兵前赴迤西規取大理十一月初十

日至二十等日總兵楊玉科及派出各將并開挖地道轟陷大理東南城隅乘勢擁入城內之土城晝夜鏖戰共斃賊二千餘名奪踞蓮花池一帶賊壘官軍攻偏土城西北隅楊玉科復約束各軍四面合擊自率親軍策應施放開花大礮轟毀賊營碉樓木柵逆首杜汶秀見事勢危迫於二十五日親率死黨萬餘接仗楊玉科督軍兜剿至二十六日斃賊五六千名該逆敗入土城內之僞城情急服毒其黨將杜逆獻解軍前正法岑毓英督軍至五里橋地方環城審視探知餘酋楊榮蔡廷棟等仍形負固會商楊玉科先期密派將弁暗入分投設伏十二月初七日楊玉科率同太和縣知縣譚席珍直至縣署駐紮初九日潛入僞府督令伏兵奪據該逆廠樓賊眾驚亂岑毓英復親率各軍與楊玉科內外夾擊連日血戰殺賊萬餘賊分股由東南北三門狂竄我軍跟蹤追擊生擒

僞大冢宰馬仲山等多名殲賊三千餘名生擒僞大司衡楊榮僞
大經略蔡廷棟等盡法懲治並按獲杜逆子女杜淙揚等分別收
禁悍黨悉數殲除大理全郡肅清覽奏實深欣慰逆酋杜汶秀首
級卽著於犯事地方懸竿示眾毋庸獻馘來京其年未及歲之逆
子杜淙揚杜賡揚杜城揚三名及幼女一人著在該省嚴行監禁
並著刑部查明例案咨行該督撫照例辦理雲南巡撫岑毓英當
兵餉支絀之時激勵眾心親臨前敵攻克堅城渠魁授首實屬謀
勇兼裕調度有方深堪嘉尚著賞穿黃馬褂並賞給騎都尉世職
雲貴總督劉嶽昭與岑毓英和衷共濟克奏膚功著開復革職畱
任處分交部從優議敘記名提督開化鎮總兵楊玉科著賞給騎
都尉世職並賞給白玉翎管一支白玉搬指一箇小刀一柄大荷
包一對小荷包兩箇所有單開之總兵段瑞梅等均著交軍機處

記名遇有缺督缺出請旨簡放○諭軍機大臣等杜逆自倡亂以來流毒十有八載攻陷五十三城踞險負隅其勢甚熾岑毓英於兵單餉絀之時激勵眾心堅忍耐苦先將東南各郡次第蕩平然後專事進西卒使全境肅清渠魁授首實屬謀勇兼裕功績懋昭劉嶽昭遇事和衷克濟成績均堪嘉尚本日已明降諭旨分別加恩並將出力陣亡各員照所請獎卹俟該省全境肅清再行普沛恩施大理既復未復之順甯雲州及所屬之小猛統猛郎錫臘又騰越廳城及所屬之烏土寨馬家村並蒙化廳屬之大小園埂自應乘勝掃蕩俾全省一律廓清卽著岑毓英督同楊玉科將圍埂賊巢迅速攻拔一面料理大理善後事宜務臻妥善順甯雲州兩城前有旨令馬如龍前往攻取該提督以餉絀尚未起程所派頭起官兵僅五百名亦嫌單薄岑毓英見擬就近分軍相機進取仍

著傳知馬如龍懷遵前旨刻日帶兵徑赴順甯雲州一帶合兵會
勦以竟全功應需餉項卽著劉嶽昭妥籌接濟毋令缺乏至騰越
地方卽責成總兵李維述帶領所部前往辦理毋稍遲誤將此由
六百里各諭令知之○諭文麟奏追勦東山竄匪獲勝一摺肅州
股匪屢次出關竄擾哈密東山經文麟派令統領魏忠義督軍駐
紮塔爾納沁堡城分扼各隘探勦馬賊並將逆回馬五十九擒獲
惟該逆分股突竄蹤迹靡常刻雖被擊遠遁難保不去而復來仍
著飭令魏忠義將各要隘實力嚴防遇有賊匪竄至卽行截擊毋
令分竄其二堡葫蘆溝一帶爲該逆出竄之路並著嚴飭張忻李
生元等多設偵探嚴密扼堵以免疏虞將此由五百里諭令知之
○乙巳欽奉 慈安端裕皇太后 慈禧端佑皇太后懿旨皇帝
寅紹丕基於今十有二載春秋鼎盛典學有成茲於本月二十六

日躬親大政欣慰之餘倍深兢惕因念我朝 列聖相承無不以

敬 天法 祖之心爲勤政愛民之治況數年來東南各省雖經

底定民生尙未乂安滇隴邊境及西北路軍務未戢國用不足時

事方艱皇帝日理萬幾當敬念惟 天惟 祖 宗所以付託一

人者至重且鉅祇承家法夕惕朝乾於一切用人行行政華華講求

不可稍涉怠忽視朝之暇仍當討論經史深求古今治亂之原克

儉克勤勵精圖治此則垂簾聽政之初心所夙夜跂望而不能或

釋者也在廷王大臣等均宜公忠共矢勿避怨嫌本日召見時業

經諄諄面諭其餘中外大小臣工亦當恪恭盡職痛戒因循宏濟

艱難弼成上理有厚望焉○奉 懿旨前因皇帝沖齡亟宜乘時

典學特簡師傅朝夕輔導於今十有二年茲值親政伊始仍當不

忘古訓況學問事功互相表裏古今治忽之原政事得失之故無

不可因事監觀引爲法戒 列聖文謨武烈載在 聖訓尤應按
日恭閱庶於用人行政得有遵循國語清文亦必勤加練習皇帝
每日召見後仍應詣弘德殿與諸臣虛衷討論李鴻藻徐桐林天
齡桂清廣壽均著照常入直盡心講貫用收啟沃之功至肄武習
勞乃我朝家法騎射等事皇帝亦須次第兼習已諭令御前大臣
查照舊章隨時斟酌請旨敬謹伺候前據醇親王奕譞奏親政有
期懇將弘德殿差使撤去等語著照所請嗣後毋庸入直弘德殿
○丙午 上親政率王以下大學士六部九卿詣 慈甯門行慶
賀禮○諭內閣朕受 皇考文宗顯皇帝付託之重冲齡踐阼時
事多艱仰賴 慈安端裕皇太后 慈禧端佑皇太后垂簾聽政
簡任親賢勵精圖治十餘年來粵捻各匪次第蕩平滇隴邊疆漸
臻底定洵足以揚 先烈而奠丕基 盛德豐功超邁前古朕仰

蒙 慈蔭得以及時典學日就月將茲復渥被 聖慈命朕躬親
大政孳孳以敬 天法 祖勤政愛民爲念仔肩至重深懼弗克
負荷惟有恪遵 訓諭兢兢業業上懍 祖 宗締造之艱下慰
中外臣民之望用以祇承家法仰荅 慈恩至在廷王大臣及各
省封疆大吏務當共矢公忠匡朕不逮其餘大小臣工亦宜精白
乃心恪恭盡職勤求吏治乂安民生以冀上副我兩宮 皇太后
諄諄訓誡至意○諭上年自冬至後朕恭遇 壇 廟大祀敬謹
親詣行禮而 奉先殿未經特祭恭查咸豐二年 皇考文宗顯
皇帝親詣 奉先殿致祭行禮朕親政後自當敬法 前謨用申
誠悃謹於三月初一日恭詣 奉先殿前殿讀祝致祭所有應行
典禮著名該衙門照例敬謹豫備○已酉諭軍機大臣等戶部奉
部庫空虛應行存儲款項請照初議另款封存一摺四成洋稅銀

兩前經總理各國事務衙門奏明解交部庫另款存儲近因各衙門奏支之款絡繹不絕正項不敷隨時那借殊與初議不符著該部遵照奏准原案全數封存以後各海關報解四成洋稅隨到隨封連前所存一概不准擅動如庫存正項一時不敷周轉惟入旗兵餉及神機營經費暨隨時緊要軍需准由該部奏明暫借四成洋稅開放仍俟正項充裕照數撥還其餘一切放款概不准奏借此項致啟那移之漸另摺奏內府外庫定制攸分各宜量入爲出不可牽混又片奏內府經費仍照舊添撥各等語內務府供應內廷一切用項本有粵海關天津長蘆應解各款及莊園頭租銀加以戶部每年添撥經費量入爲出何至用款不敷著總管內務府大臣於一切應用之需覈實撙節並嚴飭各該司員認真辦理毋得任意開銷致涉浮冒其各省關例解款項如逾限不到或仍前

拖欠卽由該大臣等奏明將該督撫監督運使等嚴予處分以儆
玩泄至由部奏撥之六十萬兩見經戶部奏明仍按年籌撥是內
府用款不至過絀嗣後不得再向戶部借撥以符定制將此各諭
令知之○是月蠲緩直隸安州等五州縣被水上年額賦江西蓮
花等二十八廳縣暨九江府同知所屬歙收新舊額賦雜課廣西
永安等二十八州縣被擾被旱上年額賦暨兵米緩徵直隸祁州
等三十八州縣被水額賦山東濟甯等三十九州縣東昌等四衛
被水被旱被蟲被風上忙額賦租課廣東海陽等四縣被水同治
十年額賦兩浙錢清等六場被災竈課展緩直隸深州等三十五
州縣積欠糧租倉穀

二月庚戌朔諭軍機大臣等前因喬松年奏籌辦黃運兩河情形
文彬丁寶楨奏請仍挽復淮徐故道並御史游百川奏河運並治

宜詳籌妥辦等情當經降旨交軍機大臣會同六部九卿妥議具奏茲據遵議會奏請派大員前往山東查勘各等語黃河自銅瓦廂決口改道北行後泛濫山東境內久爲漕運民生之害見在淮徐故道旣難規復豈可聽其自然不爲修治喬松年前奏堵合霍橋決口築隄束水使由張秋八里廟一口下注入海旁流分注藉以濟運所擬辦法究竟是否可行有無窒礙必須籌畫萬全方可興辦此事關係重大固不可日久因循亦未便輕率從事李鴻章曾在山東勦辦捻匪於黃運兩河情形閱歷旣久自必熟悉著該督將喬松年等所奏悉心體察從長計議應如何妥籌辦法期於漕運民生兩有神益及辦理有無把握之處據實詳細具奏原摺片著鈔給閱看將此諭令知之○下詔修省求直言並諭各省舉賢能杜侵漁○癸丑諭軍機大臣等榮全奏餉絀兵單豫籌辦法

一摺榮全接到俄官來咨不令管伊犁人民並擬派伊犁官員銀兩不遵卽治其罪且聞有東進之說榮全以調兵必先集團餉項支絀各省報解寥寥自係實在情形所請將山西等省月協餉銀三萬五千兩由戶部先撥見款批交神機營與前請每月一萬三千兩之項源源解濟再令各該省將應協之餉解還部庫等語著戶部議具奏該署將軍務當臨機應變將調兵集團及進兵道路並運解軍火各事宜先行妥爲布置以圖進取俟戶部議定後如何籌濟餉需卽行諭知該署將軍遵照辦理另摺奏因病懇請開缺又片奏病如增劇擬先赴京就醫各等語榮全宣力邊疆歷有年所且數年來備嘗艱苦茲因積勞病發懇請開缺廕念殊深惟見在新疆各城未復非熟悉該處情形者斷難勝任榮全當力疾從公以副委任未可遽萌退志著加恩賞假一箇月在營調理

毋庸開缺刻下事關緊要接替乏人不得率行起程回京致誤事
機將此由五百里諭令知之○戊午祭 大社 大稷○加上

慈安端裕皇太后徽號曰 慈安端裕康慶皇太后 慈禧端佑

皇太后徽號曰 慈禧端佑康頤皇太后 御慈甯宮 上率諸

王大臣行慶賀禮○左宗棠奏西甯附郡地方震懾兵威其求撫

者又經劉錦棠推誠相待羣爲感動陝回中如崔偉畢大才禹中

海土回中如冶福興馬福壽卽江湖三楊保元目者外各回目悉

矢志輸誠天心漸定惟大通縣地居邊徼未覩軍威向陽堡逆目

馬進祿下亂泉逆目韓起壽卽半角頭本叛員馬桂源馬本源腹

心大通營都司馬壽尤爲狡黠劉錦棠先飭總兵胡萬亨赴大通

督收回眾所繳賑糧本形踴躍馬桂源由巴燕戎格遣人暗勾馬

壽等糾黨戕害領賑難民數十人撫回崔偉畢大才禹中海等願

勦賊自效劉錦棠派總兵譚慎典率數十騎督同前進十二月二十六日遇賊於距通十里之姑姑加莊敗之斃賊數十名撫回各隊均有傷亡劉錦棠布置郡防率隊繼進正月初一日悍賊千餘撲崔偉等營盤崔偉等率馬隊擊走之追殺十餘里斃賊八九十名生擒四十餘名訊出叛弁馬壽之姪馬良才斬之初四日劉錦棠進兵攻向陽堡提督吳隆海陳汝俊蔣月華等由左路進提督熊隆名陳啟明繼之提督余虎恩遊擊董福祥由右路進親率提督席大成進中路譚慎典率崔偉各隊排列河西前西甯鎮總兵黃武賢亦飭遊擊黃金福率師來會分道猛進出巢之賊約三千餘分東西南三面正修砌礮臺見官軍至拚死抗拒官軍槍礮齊轟繼以刀矛立斃悍賊數十名賊始敗縮堡中憑堡放槍擲石官軍於礮石中冒險肉薄而登傷亡不少吳隆海陳汝俊蔣月華憤

甚持軍毀其堡門奮躍而入各軍亦攀堞齊登立將巷戰之賊千餘悉駢斬之賊之奪東牆出走者約尙三四百人熊隆名陳啟明率馬隊及郭蟒寺練總陳海馬隊追殺淨盡堡中賊均遁入二小堡登樓上屋擲石放槍仍圖抗拒吳隆海董福祥立破其一尙餘一堡正派隊圍攻閒礮樓屋頂之賊號呼乞命稱爲賊目所脅請官軍緩攻願盡縛賊目以獻問其姓名始知馬壽馬進祿韓起壽及河西著名匪徒悉在其中當令縛獻首從四十餘人提馬進祿韓起壽陣前磔死餘逆概予駢誅惟畱叛弁馬壽拘守未誅飭令飛告縣城各回勒限出城並捆獻爲逆者始免勦洗其撫回馬福壽又於賊眾中指認與馬桂源兄弟暗相勾結之逆回三十餘人悉訊明斬決餘眾千餘概行釋免軍威丕震各處回眾聞風畏懼搶額哀鳴願繳馬械獻匪人求免勦洗劉錦棠逐加撫諭令其速

繳馬匹槍械勿萌異心自干誅戮惟大通營及永安一帶回巢距大通縣城二十餘里尙須移軍勦辦見正料理拔營臣維西甯地勢遼闊向爲回番窟穴山嶺複沓西北徑通關外西南均接青海西藏四十餘年等於絕域聲教久已不行劉錦棠破賊解圍後回眾震於兵威均各款附惟土客各回多疑善詐自不知所犯不赦恐併遭誅戮其黠者復多方煽惑暗肆阻撓此時若操之太蹙必致人人自危兵威一加轉得有所藉口自不得不宣示恩信堅良回就撫之心迨安撫漸多來投者亦請速誅反側自明心迹而後因用之庶收以回攻回之效又此次大通逆目馬進祿韓起壽等鼓惑叛弁馬壽詭謀煽變戕害領賑難民孽繇自作官軍急起勦之逆目無一漏網恩信無渝聲威更暢俾誠心就撫者知感挾詐來投者知畏其於勦撫兼施機宜似尙允協惟馬本源兄弟竄踞

巴燕戎格爲時已久雖徧詣各軍求撫而仍巧持兩端暗行勾結
必須速予殲除臣宗棠已飭陳湜沈玉遂率河州太子寺三甲集
各營隊伍由河州前進令撫回軍功馬占鼈馬永瑞等各率所部
爲之前驅並檄提督劉明燈總兵敖天印分扼米拉溝各要隘以
杜竄越復調降補參將楊世俊率馬步各營由扁都口一帶移駐
大通冀可速赴戎機又奏肅州逆回自十月間屢敗後伏匿不出
惟分股於城西禮拜寺附近添築堅堡爲犄角提督徐占彪分派
各營輪班攻撲十二月十九日城賊出馬步三千餘分撲署總兵
王子龍黃祖福營勢甚兇悍徐占彪飛調提督陳春萬千總藍明
泰循長濠擊其前自率總兵宋賢聲齊懷松遊擊徐春先秦玉盛
等從黃草坡鈔其後復飭總兵李洪超陳登雲越長濠擣其中堅
三路並進王子龍見援兵已集亦開壁出迎賊腹背受敵退踞城

西北隅官軍三面環攻如牆而進賊結隊拚鬪抵死不退官軍勇氣百倍縱橫盪決自卯至申鏖戰歷六時之久殲賊甚多復以劈山礮向賊團聚處轟之賊更不支向北奪路而退徐占彪揮軍追殺適副將桂錫楨守備武朝聘各馬隊由北巖頭馳至兩路夾擊賊屍枕藉餘賊竄入北稍門時已二鼓矣計生擒二十八名陣斃悍賊二百餘名訊據擒賊供稱馬四以援絕勢蹙挑悍黨千餘啖以重資爲背城之戰不虞仍爲官軍痛剿賊目死傷甚多當將擒賊斬決徐占彪以城西之堡守禦綦嚴偪攻徒傷精銳惟有用地雷轟之各營弁勇輪挖地道二十三日工竣安置藥匣引綫二十四日初更飭提督黃虎臣徐春先陳春萬率隊順黃草渠繞至堡前阻其出路兼截南稍門出援之賊飭李洪超陳登雲黃祖福率隊前赴堡北遏賊北竄截北稍門及禮拜寺援賊親率馬步環伏

堡之左右四更時地雷併發立塌堡牆一丈有餘守牆者多飛墮牆外計斃數十名餘賊開壁四竄伏軍四起呼聲動地賊自相踐踏官軍趁勢越入賊堡刀矛並進陣斬僞千長馬文拴賊六十三名內有僞催兵百長馬四把子堡內賊無一脫者時城內出援之賊亦被李洪超等擊敗之是役共擒斬三四百名訊據馬四把子供稱賊勢窘蹙異常請入城諭撫徐占彪以回情狡詐未准所請又知援軍將至攻堅大礮亦與偕來軍心益奮臣維肅逆勢孤力竭臣前派提督陶生林戴宏勝等馬步五營歸徐占彪節制調遣已於十二月二十三日行過甘州不數日即可抵肅金順先撥各營亦可剋期會剿以局勢論賊愈蹙而兵愈增計可剋期蕝事上諭軍機大臣等大通逆目馬進祿等鼓惑叛弁馬壽詭謀煽變經劉錦棠督軍進剿攻破向陽堡逆巢並將著名逆酋悉數擒斬

勦辦尙屬得手叛員馬本源等久踞巴燕戎格徧詣各軍求撫仍持兩端暗行勾結必須迅速勦辦左宗棠已派陳湜等軍由河州前進著卽飭令實力攻勦並嚴扼米拉溝等處竄路以期一鼓殲除大通一帶回匪仍著飭令劉錦棠等乘勝進兵勦撫兼施速籌戡定平番碾伯一帶防勦事宜著豫師督飭所部與左宗棠派出各營聯絡策應毋稍鬆懈肅州城西賊堡經官軍用地雷轟破城內賊勢已蹙惟同情狡詐未可輕聽乞撫之詞致墮詭計見在陶生林等軍計已抵肅兵力較厚著左宗棠飭令徐占彪激勵將士奮力圍勦迅拔堅城毋任日久盤踞將此由五百里各諭令知之○左宗棠奏河州回目馬占鼇馬永瑞自就撫後疊辦各務均極妥愼嗣接捕河州土匪及各處竄匿回目多名臣察其悔罪輸誠切實可靠令挑選回勇兩營飭馬占鼇督帶馬永瑞副之仍歸河

州鎮總兵沈玉遂統帶勦賊立功茲據沈玉遂稟稱同治十一年十二月二十八日米拉溝撫回馬良義飛報馬桂源等率賊千餘衝撲細巷地方圍丁眾寡不敵被賊焚掠勢圖東竄當經東鄉回目馬悟眞卽馬尕大將河冰凝結各處併力鑿開斷賊偷渡沈玉遂飭馬占鼇馬永瑞率左右兩營隨官軍勦賊復派馬營回目馬仲有下川口回目安朝玉等各率丁壯助勦二十九日抵米拉溝馬良義等正與賊戰馬占鼇適至率回勇奮力夾擊陣斬悍賊數十名官軍率馬仲有等乘勢壓勦復斃賊數十名生擒二十三名內有馬麻希馬腮巷蘇美成七十八馬洒兒蘇狗免勒者布七名俱著名逆目也餘賊敗竄歸巢官軍回勇均各有傷亡又東鄉匪首高復箇亦經馬占鼇等勦平是馬占鼇等投誠以來實能勦賊自效此次馬桂源喉嚨黨出竄合力堵勦痛挫兇鋒尙屬奮勉旋據

馬占鰲馬永瑞馬悟眞等赴臣署謁見諭以順逆之理禍福之機

均能感悟亟思立功自贖合無仰懇天恩准給馬占鰲花翎五

品頂戴馬永瑞藍翎五品頂戴馬悟眞五品頂戴以資觀感出自

鴻施奏入上允之○左宗棠奏宋慶一軍因鮑源深奏畱稽

遲良久嗣蒙諭旨飭催西進將士歡忻鼓舞分起趨行宋慶輕騎

馳赴蘭州已於二月二十六日接晤面商一切其大隊馬步三月

初旬均可於蘭州取齊臣之奏調該軍原因穆圖善面商率所部

赴甘涼以重西路形勢嗣以回任赴陝並請臣事前毫無所聞迨

奉旨允其赴陝臣一時倉卒不得不改調宋軍既蒙聖明鑒允

不料爲鮑源深所阻復多稽滯見甫到蘭州不及先扼甘州兼遏

西甯逸賊於兵謀未免稍舛然西事方殷正賴樸健良將共圖戡

定此時惟有暫駐涼州以就軍食俟夏收登場轉涼郡之糧以赴

甘俟甘郡秋收登場轉甘郡之糧以赴肅庶幾師行無滯制勝可期以愚見度之將來非於肅州設力總臺收儲糧料子藥又於前後各處節設轉運局不可蓋西北用兵艱阻勞費百倍內地勢有固然歷代兵事得失之分必在乎此謹附片陳明報聞○予甘肅陣亡提督朱南英等祭葬世職○己未以恭上 慈安端裕康慶皇太后 慈禧端佑康頤皇太后徽號禮成 上御太和殿王以下文武官員行慶賀禮頒詔天下覃恩有差○庚申諭軍機大臣等常順等奏督隊進紮以扼賊衝並豫籌軍儲景廉奏請採買戰馬耕牛各摺片烏城防剿緊要見在肅州軍務正在得手誠恐賊匪竄出紛擾該城防堵未可稍疏常順等擬飛催福珠禮馬隊並宣化等練軍到城分起扼紮惟福珠禮一軍前經諭令杜嘎爾飭令馳赴榮全軍營該城不得截留宣化等練軍亦據李鴻章奏稱

該處存兵無多未能抽調諭令該署將軍等咨商張廷岳等於庫防練軍內酌量抽撥就近赴烏常順多布沁扎木楚志剛務當就見有兵力扼紮嚴防勤加偵探儻賊勢緊急常順等當親往督勦毋稍疏虞該城需用火器甚急著神機營調撥洋槍五百桿隨帶洋火藥鉛箭銅帽配帶什物以及擦槍器具排槍二百桿隨帶鉛丸二萬出配帶什物彈模等項卽行解赴察哈爾都統衙門並著定安調撥子母礮四十位隨帶馬架擡槍一百桿隨帶鉛丸一萬出配帶什物彈模等項統由常順等卽派官兵分往迎提以資防勦景廉勦辦賊匪馬匹缺乏並奇古屯田牛隻短少採買維艱著常順多布沁扎木楚志剛托倫布保英各飭所屬會同景廉委員在蒙古部落採買戰馬一千匹耕牛一千頭解送到營俾資應用所需價值先由該城墊發俟景廉軍餉到烏扣還常順等另摺奏

遵查烏科兩城具報賊數互異情形據實覆陳等語軍營偵探最
關緊要常順等前奏賊匪數目係據該部落探報倉卒馳陳未克
確查嗣後惟當確切偵探妥籌防剿毋得稍涉張皇致滋貽誤將
此由五百里各諭令知之○回逆犯古城諭景廉防剿○辛酉諭
軍機大臣等金順奏前隊進紮肅州設法催運軍糧一摺金順所
派前隊總兵俞厚安等軍見已馳抵肅州該前將軍擬將甘州高
臺各處糧運辦理稍有端倪卽由高臺滾營前進規取肅州日內
計早抵肅惟前因成祿情罪重大諭令該前將軍酌帶所部兼程
出關接統其軍傳旨將該提督革職擊問解京又因景廉需兵孔
急復諭令該前將軍於接統成祿所部後卽飭李天和三營馳赴
景廉軍營聽候調遣關外事機緊要金順當懷遵正月二十一日
本月十一日兩次密諭酌帶勁兵剋日出關將諭辦各事妥速籌

辦以慰廬懷肅州賊鋒屢挫機有可乘該前將軍所部各隊應否酌留若干助剿抑須全行調赴前敵之處著金順斟酌軍情妥籌辦理該軍所需糧石卽照所議隨時與左宗棠和衷商辦俾利師行○乙丑諭軍機大臣等都興阿奏股匪突出滋擾派隊剿辦情形一摺奉天牛莊屬界黃沙坨高麗房身龔家地雙岔子等處突有馬賊分竄滋擾旋卽合股百人麇聚虎獐屯地方經該將軍派令總兵張得祿營總訥欽馳赴牛莊會同防守尉果勒明阿帶隊接剿追至鷹城子缸瓦嶺等處擒斬甚多餘賊渡河逃逸淹斃無算此股馬賊嘯聚省南山溪之間久逃顯戮見在出擾牛莊屬境雖經斬馘多名誠恐餘黨未盡殲除復圖狡逞都興阿惟當嚴飭派出各員弁等實力接緝務將南路伏莽一律芟除毋畱餘孽至西路地方並飭撤回隊伍認真防範毋得稍有疏虞將此諭令知

之○丁卯諭李鴻章嚴捕滋事游勇○改山東文登協中軍都司
爲陸路文登營都司隸登州鎮總兵官統轄○庚午諭軍機大臣
等劉嶽昭岑毓英奏攻克蒙化廳屬大小圍埂岑毓英奏查明參
將梁士美被仇刺殺辦理情形擬派楊玉科進攻順甯等城各摺
片蒙化廳屬賊黨見已悉數殲除事機順手自應乘此聲威迅將
未復各城力圖攻拔岑毓英前派總兵段瑞梅蔡標等分攻順甯
雲州二城兵力尙單著卽責成提督楊玉科親帶所部馳往督同
段瑞梅等併力進攻肅清邊圉大理府城一切善後事宜著該撫
懷遵前旨酌度辦理其騰越廳城卽飭令李維述速籌規取毋稍
延緩干總沈朝輔向助參將梁士美跋扈驕恣旋因爭權懷怨主
使將梁士美刺殺並誘殺紳士多人聚眾謀爲不軌抗拒官軍實
屬罪不容誅業經格殺洵足以申國法而快人心其下手兇犯沈

有能等仍著該督撫飭屬嚴拏毋任漏網已革副將和耀曾勦賊出力前已有旨以總兵記名簡放著照所請准其開復副將原官免繳捐復銀兩並仍照原保獎勵都司楊九貴棄營私逃回籍把持錢糧公事實屬大干法紀楊九貴著卽革職嚴拏究辦以肅軍紀將此由五百里各諭令知之○予雲南陣亡副將岑寬德等祭葬世職○乙亥諭軍機大臣等金順奏全師抵肅勦賊獲勝一摺總兵劉宏發等於正月十四五等日會同徐占彪各隊攻勦肅逆疊獲勝仗勦辦尙屬出力該前將軍督率後隊於正月十八日齊抵肅州卽著懌遵疊次密諭酌帶兵勇星速出關接統成祿所部一面傳旨將該提督革職拏問不准稍涉遲延致有洩漏肅州一城尙稽攻克該前將軍所部隊伍應否酌畱若干助勦抑須全行調赴關外之處並著仍遵前旨斟酌軍情妥籌辦理另片奏革員

赴營投效等語已革協領花里雅春著准其畱營差遣○乙亥予故兩江總督曾國藩於揚州建祠○是月豁免江蘇邳州等十六州縣暨淮安等三衛被擾節年民欠額賦

三月己卯朔諭軍機大臣等張廷岳阿爾塔什達奏賊匪意圖竄擾豫籌堵擊一摺賊匪勾結甘肅州逆黨由阿拉善王旗竄至諾彥山一帶圖犯庫倫西南張廷岳等已檄齊莫特多爾濟等各帶尼招等處逼近庫倫西南張廷岳等已檄齊莫特多爾濟等各帶所部分投防守並飭宣古兩營會同蒙古各營扼紮庫倫迤西聯絡聲勢以防賊匪奔竄所籌尙妥仍著張廷岳等隨時偵探盤查毋任賊匪濶入如遇匪蹤竄近卽著督飭各營相機前後夾擊痛加剿洗以期一鼓聚殲諾彥山等處地多險阻易於藏奸其平原處所路路可通並無要隘足扼賊蹤飄忽靡定各遊牧又路徑紛

歧尤虞伺隙四竄亟應一體防範以遏妖氛著定安常順多布沁
扎木楚志剛杜嘎爾張曜實力嚴防遇賊卽擊毋任紛竄將此由
五百里諭知定安常順多布沁扎木楚志剛杜嘎爾張廷岳阿爾
塔什達並傳諭張曜知之○壬午張建基以病免以林之望爲湖
北布政使前甘肅布政使○癸未 上奉 慈安端裕康慶皇太后 慈
禧端佑康頤皇太后啟鑾謁 東陵○免蹕路經過地方本年額
賦十分之三○乙酉賞看守行宮弁兵半月錢糧○丙戌 上謁

昭西陵 孝陵 孝東陵 景陵 裕陵 定陵○丁亥清明

節 上謁 定陵行數土禮率王以下文武大臣詣 隆恩殿行
大饗禮禮成詣明樓前行辭謁禮○臨奠端慧皇太子園寢 上
奉 慈安端裕康慶皇太后 慈禧端佑康頤皇太后回鑾○己
丑左宗棠奏正月初六七兩日劉錦棠進規大通查看一路堡寨

林立若節節攻取必滯戎機而懸軍深入又恐後路多梗乃畱六營擇要駐紮一面整隊速進初八日撫回治復與馬福壽由通城馳至稟知城關回眾約二千餘惟叛弁馬壽之黨千長馬長忠韓喜文王成宗僞軍師袁滿拉等及其死黨仍誓死抗拒餘皆畏懼兵威並無固志劉錦棠飭遊擊董福祥畱守向陽堡親率各營縛馬壽以行甫抵城邊踞城之賊礮石紛下劉錦棠揮軍環攻令治復興馬福壽繞城而呼獻城迎降者免死擒賊者重賞忽見回眾數百開西門奔出羅拜馬前劉錦棠整隊入城逆賊嗾眾下城巷戰各營乘勢猱騰而上立克縣城劉錦棠下令撫諭降眾飭令導引官軍覓擒賊目當獲二百餘名斬之分飭各營分屯城關查點城內漢民據供向有三千餘人逆弁馬壽自小峽敗歸戕其丁壯見僅畱老弱婦女六百餘口號哭之聲慘不忍聞劉錦棠遂提馬

壽磔於市漢民爭摘其心肺啖之立盡並拾其死黨馬長忠等一百八十餘名駢戮之河東西及近城莊堡各頭目踵營納款均請盡繳馬械捆獻匪黨求免進剿西甯道郭襄之委畱陝補用知縣黃仁治署大通縣篆初十日至城劉錦棠飭辦善後遷城關回民於河東西另招城西北遜布馬廠利順張家寺各漢堡難民資之路旁回堡亦量與難民更易十一二日降回紛至大通營及永安一帶回目望風款附該處距城已在二百里外矣十四五六等日各莊捆獻匪黨一百五六十名悉斬以徇人心大定十九日劉錦棠率隊仍旋西甯陝回在西甯者丁壯老弱婦女統計尙二萬有奇崔偉禹得彥畢大才等傾心向化劉錦棠挑其精壯立爲精善馬隊向陽堡之役助剿尤力惟白彥虎一起狡黠異常聞大通蕨事自知罪孽重大慮不爲官軍所容雖亦僞詞乞撫而責其呈繳

馬械則遷延支展觀望不前崔偉等陰告劉錦棠豫爲之備劉錦棠時在大通飭撫回治復興率隊駐水硤一帶扼之十四五等日兩戰皆捷十六日深追遇伏所部亡失甚多治復興被賊生擒不屈死之白彥虎旋率眷屬黨與約二千餘潰出由永安南山草灘一帶狂竄劉錦棠以方遷徙陝回各巨股老少不遑追截各陝回均俯伏哀鳴聽候安插當分爲三起約有二萬人派隊押赴平涼秦安清水等縣擇地安插臣據報卽分檄營縣妥爲照料一如化平廳故事並給新撫民每戶示諭一紙刊發良民門牌俾其遵守惟羸弱困踣行走遲滯見已分起押解給以行糧並發車馱載其婦稚輜重以過其行西甯境內自此無客回羈雜之患此遷徙西甯客回另籌安插之實在情形也臣維西甯地方遭回逆蹂躪久已名存實亡據土民云不覩天日者四十三年矣劉錦棠解西甯

圍後痛勦大通悍賊一面收撫使輸誠者懷德挾詐者畏威俾糜爛至極不可收拾之區倏臻底定惟白彥虎乘隙狂竄偵知經過鐵賣溝等處冒雪奔馳途中凍僵者不少臣宗棠前檄降補參將楊世俊率所部馬步各隊及甘涼肅各軍准備截擊見據稟報已各有擒斬尙未收隊容緩陳明以清眉目而各軍探稟所報賊數多寡不同或者該逆途中多所迫脅未可知也其禹得彥崔偉畢大才等由西甯碾伯平番過省點驗行走安靜當經遴員護解平涼清水秦安化平各廳縣妥籌安插西甯各屬善後事宜亦分飭斟酌妥辦冀一勞永逸茲後患而竟前功又奏馬本源兄弟竄踞巴燕戎格城自知罪在不赦意圖負隅聞劉錦棠逼勦大通復糾股竄紮巴城冀襲後路臣宗棠先檄飭提督劉明燈總兵敖天印扼屯險隘該逆懼不敢前而陳湜沈玉遂已率河州各軍於正月

二十六日抵大河家偵知該逆眷屬均在戎城因商派提督張仲春陳廣發總兵楊芳桂戴定邦率五品花翎馬占鼐及馬仲友馬良義等分起夤夜疾趨查大河家赴戎之路一由循化一由米拉三溝兩路稍平而較遠乃議取道番地翻山直擣戎城攻其不備連日大雪迷漫各軍衝寒度險二十九日抵端莊距巴城二十里回目馬永福等率眾迎降詢知馬桂源兄弟帶其死黨數百騎甫赴札巴正圖挈眷他竄陳湜等立飭馬占鼐率馬如蛟馬德等急進沈玉遂等督輕騎繼之馳至戎城叛逆業經西竄餘黨正絡繹奔赴官軍急分隊入城一面跟追十餘里及賊後隊賊返旗抗拒官軍奮威衝殺斃悍賊七八十名截獲逆眷六口及其姻黨十餘名二月初一日劉明燈敖天印率所部由米拉溝來會分駐城關寅所獲馬本源馬桂源妻子於獄時大雪不止知該逆未遽遠颺

也劉明燈沈玉遂飭弁帶回勇楊生魁周世祥蔣來成馬仲魁馬永昌馬伏清等深入賊中諭以脅從罔治之意回眾爭繳馬械乞撫叛逆馬桂源兄弟見人心已離惶懼益甚陰遣死黨求救於軍功馬占崙馬占鼐飭其盡繳馬械初四日齊赴城外東山乞撫一面稟知沈玉遂沈玉遂密派馬步隊環伏東山要隘比該逆至遂俯首就縛陳湜赴巴燕廳先提其死黨馬五麻海乙什馬肖箇麻箇子等三十餘犯斬之下馬桂源馬本源馬祺源於獄連日按拏餘匪並勒限外五工撒拉各頭目悉繳馬械並撥各營扼要駐紮擬俟辦理循化一律就緒乃可班師先派兩營將馬桂源兄弟眷口押解赴省訊辦臣維巴燕戎回番雜處山谷幽險與循化廳緊接叛逆馬桂源等本循化回族其由西甯遁入巴燕戎也蓋圖廣行句結爲西竄之謀幸陳湜籌策精審沈玉遂及各營將士勦力

同心其始不露聲色以緩其謀其繼解散黨與以孤其勢遂令狡猾兇豎自入網羅不致重煩兵力又河湟表裏互爲聲應荒服闊絕用兵至難就河湟而言非先定河州剿撫兼施湟中亦難措手此次收復巴燕戎廳員弁勇丁均平定河州著績之人應請彙入一案保獎以昭激勸 上諭軍機大臣等大通縣城爲逆回所踞堡寨林立劉錦棠訪知其中死黨無多餘皆畏懼兵威因勢利導遂克縣城並將叛弁馬壽等擒斬辦理甚合機宜卽著左宗棠等飭令劉錦棠將善後事宜妥爲籌辦以期一勞永逸白彥虎乘隙狂竄左宗棠等當飭在事各軍認真追捕務獲毋令日久稽誅此次出力文武員弁著准彙入前次各保案奏請獎勵另摺奏攻克巴燕戎城情形已降旨將出力人員照所請獎勵矣將此由六百里各諭令知之○左宗棠奏金順一軍於十二月二十八日進紮

城外北巖頭二十九日提督徐占彪見金軍揚旗出隊慮其初到未諳地勢賊情派隊馳赴北河灘爲其策應賊先由北稍門出馬步二三千與金軍隔河相持見金軍至蠡擁來撲徐占彪嚴陣以待賊不敢近惟以槍礮轟擊良久賊稍懈徐占彪飭提督陳春萬總兵黃祖福遊擊徐先春鈔其左總兵宋賢聲李洪超陳登雲鈔其右賊分兩路抵敵正酣戰閒徐占彪率隊直擣中堅賊退敗適副將桂錫楨參將武朝聘從後截之追殺至北門而還計斃悍賊七八十名正月初二日臣所派往之提督陶生林金慶元總兵戴宏勝等馬步五營抵肅初四日賊與金軍接戰徐軍率隊援之賊退入城徐占彪連日於城西北添築六壘扼賊出入要路初八日黎明北稍門出步賊二三千馬賊五六百騎撲官軍新築各壘徐占彪以此路爲賊所必爭飛飭各營三路並進各壘亦開壁出擊

斃賊甚多賊退踞城根抗拒並多匿溝中遮蔽槍礮見官軍愈偏愈緊初更後溝內匿賊潛遁入城官軍追殺至北稍門收隊初九日東稍門出馬賊四五百騎北稍門出步賊千餘仍撲新築各壘徐占彪率各營分路擊之賊尙未退忽南稍門出步賊七八百衝至官軍濠邊徐占彪飛調陶生林總兵齊懷松參將方友升等縱橫擊之兩路賊均敗入城計共斃賊百餘名訊據賊供初八日之戰高臺老二僞元帥戈什頭目王連萬長千長頭目十餘名均被陣斬初十日賊八九百復出北稍門甫列東湖灘卽經官軍擊敗退匿廢堡徐占彪飭開後膛開花礮擊斃甚多初十日夜三更後探報新到關外援賊四千餘帶叉子槍多桿並運糧駝千餘隻由北稍門偷入徐占彪飛調武朝聘方友升等馳往堵剿正值該逆絡繹入城之際官軍鼓銳截殺陣斬數十名生擒十八名奪獲

駱駝二百餘隻訊據擒賊供稱馬四上年派口外阿渾李得隆赴紅廟子求援此股援賊係紅廟子逆首妥鄉約後隊阿渾裸萬材帶來徐占彪以前在城西北添築之壘距北稍門之路尙遠且營數過單十三日察看北門河灘忽見馬四於單家屯莊就廢堡連夜築成大方堡一座牆垣堅厚濠溝二道外加木城二道徐占彪以此堡不破則北稍門之圍猶有罅漏因於是夜派金慶元戴宏勝等環賊堡偪築四壘十四日黎明北稍門出馬步賊三四千分爲兩股一伏近堡廢牆內一撲戴宏勝營壘徐占彪親率遊擊鄭光平及陳春萬宋賢聲等迎頭猛擊令陶生林桂錫楨秦玉盛參將馮桂增等分左右後三路鈔之金軍派隊會剿戴宏勝亦乘勢出戰將兩股賊圍困一處斃賊無算賊敗退城下徐占彪以槍礮轟擊忽礮聲不震正詫異間瞥見賊婦女二人倒豎陣前似以妖

術壓勝者徐占彪連放二十餘礮轟塌堡垣丈餘堡賊竄出二三百被官軍圍殺逃脫無幾餘賊仍踞堡死守城上槍礮雨集官軍攻至黃昏收隊徐占彪知堡賊必已膽落是夜潛派各營環伏堡外隨令施放開花後膛大礮聞堡內人聲鼎沸知斃賊已多俄而堡內竄出賊三四百匿堡後濠溝被伏堡後官軍截殺搥斬百餘名徐占彪乘勝衝殺入堡堡內殘賊鮮得脫者天初明城中鳴鐘發鼓北稍門出馬步賊六七百與敗殘餘賊合股循濠而來適遇伏堡西官軍突起截之伏堡右官軍亦躍出夾攻其追殺堡後竄賊之官軍亦從中路橫衝賊隊斃賊多名賊大潰城中鐘鼓愈急徐占彪知賊必出大股拚命鏖戰飛調各軍分五路部署甫定北稍門果出馬步賊數千圖奪附城新堡並分股撲堡外官軍城上槍礮助之徐占彪令對賊圍聚之處連開大礮又向城頭轟擊賊

紛紛倒撲時陶生林桂錫楨等分東西馳至徐占彪率隊從中路衝殺金慶元等由東湖灘橫截而出金軍馬步亦至賊應接不暇秦玉盛等又由北稍門截賊歸路賊殊死戰官軍四面盪決殲賊甚多二十一口賊復由北稍門出馬步二千餘循北河灘疾趨直撲戴宏勝營壘徐占彪飛飭各營張兩翼擊之親自率隊衝鋒而前至地勢平坦處賊忽走匿廢堡廢牆內徐占彪以前途無險可憑察看賊情有異勒兵勿進潛派各營於東南一帶分起設伏少頃東稍門忽出馬步賊二千餘衝撲藍明泰等營壘頃刻間逼近長壕各伏兵覘賊已深入一齊突出金軍亦派隊會擊賊敗退回城北稍門匿賊亦退是夜三更徐占彪令出賊不意襲攻禮拜寺每營挑壯士數十令方友升馬隊亦改步隊與黃祖福等伏寺之北陳春萬等伏寺之南徐占彪率隊伏寺之西其東面距城僅百

步五更後調後膛開花礮對寺轟放子落開花寺賊惶遽急起出寺拚鬪東北兩面伏兵齊起賊不知所措躍入城濠竄匿寺內餘賊欲逃無路天將明金軍馬步亦至徐占彪於寺西架立雲梯督隊直上又飭壯士趨寺東附城一面斬關搶入寺內立克禮拜寺寺中賊無漏網者派幫統提督黃虎臣以副營三哨駐之黃昏時賊復自北稍門出死黨千餘循城濠而來多攜門板敗車城上又絕下皮襖數十束似爲深夜奪寺計徐占彪精選壯士百名令各持攔牌以避城上槍子當先衝擊賊將門板敗車堆燒寺外牆門官軍分兩路鈔截一面將火撲滅副營亦由寺內殺出斃賊百餘餘賊敗回臣維肅州城西禮拜寺回民稱係伊先輩祖塋初入中國時死者卽多藏魄於此故敬護甚至附城之新堡與肅城相爲犄角至是均爲官軍攻破賊膽益寒長圍益密奉旨覽奏均悉仍

著督飭徐占彪等實力進攻迅圖克復陣亡參將張集昌等均著
交部從優議卹○庚寅 上奉 慈安端裕康慶皇太后 慈禧
端佑康頤皇太后還宮○甲午諭內閣鮑源深奏藩司應遵旨赴
京陛見並呈請開缺回籍補制一摺山西布政使李慶翱前在蒲
州府任內丁憂因防務緊要未能回籍自應准其補制李慶翱著
賞假百日回籍補行穿孝毋庸開缺俟假滿後卽行來京陛見○
命五城奏賑展期兩月○丙申諭軍機大臣等金順奏會攻肅州
獲勝請飭張曜前赴甘涼催山西撥解軍餉成祿奏車馬短缺未
能拔隊出關各摺片金順抵肅州後會同徐占彪攻剿獲勝賊勢
已蹙著左宗棠責成徐占彪乘此機會認真攻剿以期早竟全功
金順仍懍遵前旨剋期出關接統成祿所部能否酌畱隊伍會攻
肅城著該前將軍妥籌布置務臻周密白彥虎糾黨六七千人出

竄甘州漸近撫彝地方意圖應援肅逆牽掣官軍甘撫一帶關繫
糧運後路金順見須出關未能兼顧徐占彪所部攻剿喫緊若抽
撥隊伍前往必致兵分力單甯夏防務見尙安謐張曜平日勦賊
勇往著卽親率大隊由甘涼一路節節掃蕩而前殲除白彥虎等
股以維全局張曜拔隊後著定安飭令金運昌酌撥數營由纏金
迅赴甯夏扼要填紮聯絡聲勢毋得稍有遲延山西每月應解金
順軍餉二萬兩同治十年撥款尙有五萬兩未解月餉又不應期
該軍需用孔殷著鮑源深通盤籌畫將金順軍餉設法源源接濟
俾資飽騰成祿此次憑陳車馬短缺糧食匱乏不能拔隊前進亦
係實在情形該軍見交金順接統應需車馬糧食左宗棠務當檄
令地方官設法應付俾利師行不得意存膜視將此由六百里諭
知左宗棠定安金順鮑源深並傳諭張曜知之○諭榮全奏伊犁

兵民盼救並陳伊犁等處情形一摺俄人之在伊犁者見有一千餘眾日向索倫錫伯蒙漢人等勒索銀糧蒙漢人等窘苦盼救甚殷纏頭色得克等亦願反正歸誠榮全當隨時妥爲拊循以便相機進取至榮全接濟錫伯銀兩俄官來咨不令管理榮全咨覆謂錫伯係中國所轄之人應由中國接濟俄國無庸管理義正詞嚴所辦甚是惟當將調兵集團及疏通道路運解軍火各事宜妥爲布置用赴事機俄商前往瑪納斯貿易中途殺傷五十餘人是否回匪冒名搶劫著榮全確切查明據實具奏趙興體與瑪納斯回匪互殺賊勢似可稍蹙第首逆馬伏沅漏網而投誠之說又未可深信榮全仍當妥慎籌辦隨時咨商京廉激勵士卒設法進兵速將烏魯木齊及瑪納斯等處戡定庶可併力西進較之徵調內地兵勇難易遲速判若天淵該署將軍恐能體會此意也另片奏病

勢增劇亟盼派員接替等語見在邊事孔棘非熟悉情形者斷難
勝任榮全當懷遵二月初四日諭旨任將此由六百里諭令知之○丁酉諭內閣此次祇謁東陵謹
於定陵迤東擇有吉壤地勢雄秀山川環抱復恭奉慈安端
裕康慶皇太后慈禧端佑康頤皇太后親臨閱視敬奉懿旨
普祥峪菩陀峪卽定爲萬年吉地欽此朕仰體慈懷自應擇吉
興工普祥峪著派惇親王協辦大學士全慶總管內務府大臣
都統春佑工部右侍郎榮祿菩陀峪著派醇親王左都御史英
元總管內務府大臣吏部左侍郎魁齡總管內務府大臣工部左
侍郎明善前往敬謹辦理○己亥以英元差務較繁改派尙書英
桂恭修菩陀峪萬年吉地工程○命前塔爾巴哈台參贊大臣
富和赴烏魯木齊助剿○辛丑諭吳棠迅解貴州欠餉○予廣西

陣亡遊擊楊汝廷祭葬世職○壬寅諭軍機大臣等張曜奏竄匪擾及甘涼派隊援剿一摺據奏接據金順咨稱甘州撫彝一帶見有竄匪滋擾咨令李葆珠率隊赴肅助剿該提督當卽添派提督孫金彪遶帶隊伍馳赴鎮番會同李葆珠等將軍火等項護送西進等語肅州此時情形若何仍形喫緊卽於孫金彪李葆珠兩員中酌畱一員並酌畱隊伍以資助剿其餘隊伍仍令回紮鎮番俾資護運著金順張曜會商妥籌辦理金順前奏白彥虎出竄甘州漸近撫彝茲據該提督奏探聞該逆糾黨由大通竄至涼州西南一帶金順見須出關張曜著仍遵本月十八日諭旨親率大隊由甘涼一帶勤加偵探埽蕩而前務將白彥虎等股悉數剿滅迅殄逆氛張曜拔隊後定安常懍遵前旨卽飭金運昌酌撥數營前赴甯夏扼要填紮毋稍延緩其鎮番一帶防剿事宜並著張曜妥

籌布置務臻周密將此由五百里諭知定安金順並傳諭張曜知之○甲辰諭軍機大臣等劉長佑奏越南國勢未能自強援軍難以兼顧一摺越南近日情形益加貧弱黎裔等患近在國中濱海地方又爲法國蠶食其勢岌岌幾難自存該國不能自強動招外侮在中國撫綏藩服自難忽然第越境用兵可暫而不可久越南前次變亂業經調兵深入援應以示懷柔若長恃中國兵力其勢斷難兼顧兵法以逸待勞自應先防後剿不宜舍己從人劉長佑閱歷較深於此中機宜必能洞悉著隨時會商瑞麟統籌全局慎固邊防越南如有緩急邊境防軍即可遙爲聲援相機進止並著檄令覃遠璉等加意設防嚴杜奸徒勾結毋稍疏懈馮子材入省會商後如何情形卽著詳細具奏將此由五百里諭令知之○丁未諭內閣劉嶽昭岑毓英奏官軍攻克順甯府城並錫臘等處賊

巢及圍攻雲州獲勝一摺雲南順甯賊匪於官軍未到之先出撲大小中山各營經提督段瑞梅率師援剿自正月二十八日至二月初七日連日鏖戰連破賊營碉樓三十二座殺賊八百餘人提督楊玉科分兵往攻錫臘牽制賊勢當將錫臘攻克段瑞梅等復將橋頭山等處賊營木壘碉樓八十餘座概行平毀殺賊二千餘人並將鳳山虎山攻克乘勝直抵城下開挖地道晝夜圍攻楊玉科督飭段瑞梅等分攻各門一面架梯登城一面由轟陷處衝入節節掃蕩至二十五日將順甯府城收復逆首馬得中等均已焚斃雲州一路於正月二十六及二月初二等日屢經官軍剿擊攻拔附城河灣村賊營五座其猛郎一帶賊巢亦經次第攻破剿辦甚爲得手卽著激勵將士迅將雲州騰越兩城奮力攻復掃除餘孽以靖邊疆○諭軍機大臣等岑毓英奏滇省軍務將次肅清俟

蕩平雲州騰越等處餘孽後擬卽遣撤勇丁追繳軍器上年該省大理未克之先委員赴粵購買洋槍洋礮洋藥銅帽等物尙多未解入滇請飭沿途各省督撫截畱等語卽著瑞麟李瀚章吳棠郭柏蔭王文韶張兆棟劉長佑曾璧光飭令所屬查明雲南督撫及提督委員由粵採買洋槍洋礮各項無論行抵何處卽行悉數截畱封存該省軍裝庫以免事後清查追繳之煩將此各諭令知之○移浙江烏程縣丞於楊瀆橋與大錢司巡檢分管淩港事宜○予雲南陣亡縣丞王廷瓚等祭葬世職○是月蠲免陝西鄜州等十二州縣被擾舊欠額賦

夏四月己酉朔享 太廟○予貴州傷亡知縣朱恩榜祭葬世職○庚戌諭李鴻章籌修畿輔水利○戊午諭軍機大臣等景廉奏遵旨通籌西路全局一摺錫綸行抵布倫托海察看該處地勢空

曠無險可據暫赴阿爾泰山南駐紮擬調集蒙古喇嘛及未經回塔之厄魯特官兵以壯聲威惟該官兵等困苦異常亟應籌給款項卽著常順多布沁扎木楚志剛托倫布保英就近籌撥銀一萬兩以便錫綸派員分往迎提毋稍延緩該都統所奏錫綸宜駐紮沙山子或另擇善地徐圖進剿著景廉錫綸隨時會商妥辦趙興體等團勇錫綸當妥爲撫馭以資援應景廉以榮全前赴伊犁尙宜稍緩該署將軍所帶官兵莫若與錫綸會合以全力規取瑪納斯果能克復庶聲勢聯絡烏魯木齊可期得手彼時再議交還伊犁之事等語所籌亦是著榮全悉心酌度妥籌辦理景廉於三月內起程進紮古城居中調度該都統到古後務當妥爲布置穩慎進取以挫賊鋒而維全局巴里坤爲大軍後路景廉計已拔隊該處地方空虛李天和等隊伍一時不能到坤著文麟迅撥營勇填

紮巴城不得稍事推諉前經疊諭金順出關卽著星馳西進飭令李天和所部三營及吉林黑龍江馬隊迅赴景廉軍營以厚兵力肅州一城爲關內外樞紐亟應迅圖攻克著左宗棠檄飭徐占彪實力圍剿擒渠埽穴迅奏膚功毋任逆黨疊竄邊外致擾蒙古地方是爲至要將此由五百里各諭令知之○庚申諭軍機大臣等杜嘎爾奏會商籌備防剿一摺賊匪意圖竄擾飄忽靡常亟應認真防範杜嘎爾以軍臺四十四站縣延數千里地勢原分四段擬於中兩段左近擇要分營扼紮所籌尙妥卽著勤加防探遇賊卽擊毋稍疏虞惟該營僅有馬隊二百名不敷分布著額勒和布等卽由察哈爾八旗添調官兵三百名速赴杜嘎爾軍營以資防剿該營餉項支絀刻下兵數既添餉需尤亟察哈爾前請部款十五萬兩見在所存無多勢難分顧著戶部迅速籌撥銀五萬兩解交

察哈爾存儲由杜嘎爾按月派員請領應由何省協餉歸還之處卽由該部奏明辦理杜嘎爾一軍上年領過鍋帳等項支搭日久殘破不堪著工部再行覈發全分鍋帳二百副由額勒和布等就近派員赴部請領分撥應用毋稍稽遲將此諭知戶部工部並由四百里諭令額勒和布杜嘎爾景瑞奎昌知之○辛酉常寧祀

天於 團丘○諭軍機大臣等金順奏肅逆突圍援賊營力戰擊退並斟酌出關事宜密陳請旨各摺片肅州踞逆日夜突圍而各路援賊屢次撲犯營壘經金順會商徐占彪督率官軍奮力擊退尙屬得手惟援賊雖屬難保不再圖竄擾金順疊次諭令帶兵出關徐占彪一軍深恐兵力單薄不能遏絕外援殲除踞匪前據左宗棠奏宋慶所部三月初旬可於蘭州取齊擬令先赴涼州等語此時計早抵涼卽著左宗棠傳知該提督統率全軍剋日赴肅會

同徐占彪規復肅州盡殲醜類如宋慶一軍兵力尙慮不敷或未
能卽時西進卽著左宗棠遵照前旨另派得力隊伍迅赴肅州會
剿金順以剿賊成圍正在喫緊未可遽撤圍師率之西去已函致
成祿來肅會剿俟其到後一面安置成祿部眾一面傳旨拏問所
籌辦法殊形謬妄且與厯次諭旨不合朝廷賞功罰罪一秉大公
至正何必誘之使來作此權宜之計况信函往返難免不至洩漏
至謂成祿部眾調至關內可以近受箝制則首降諭旨原令金順
帶兵出關豈關內則可威撫關外卽不可威撫耶該前將軍仍當
懍遵疊次密諭酌帶所部迅速出關接統成祿各軍傳旨將該提
督革職拏問解京治罪以肅戎行不得藉口圍師遷延干咎並不
得藉口左宗棠所派之兵未到任意稽遲金順所部軍糧仍著左
宗棠飭屬妥籌毋令缺乏將此由六百里各密諭知之○乙丑諭

軍機大臣等定安奏籌布防剿事宜請飭各專責成暨阿拉善旗有賊竄擾各摺片定安以甯夏及阿拉善旗一帶不可無重兵鎮攝甘涼地方見有宋慶一軍防剿足敷分布似可移緩就急酌留張曜所部就近扼紮以期兼顧擬自甯夏至涼州防剿事宜責成張曜辦理其甘涼迤西請責成宋慶剿辦等語前據左宗棠奏宋慶所部擬令先赴涼州已有旨諭知左宗棠卽飭宋慶統率全軍剋日赴肅會同徐占彪攻剿以便金順出關是甘涼一帶兵力甚單亟須張曜督隊前往迅掃逆氛當此事機緊要之時豈可朝令夕更致涉鬆勁仍著定安知照張曜懍遵前旨迅赴甘涼將白彥虎等股盡數掃除毋得遷延貽誤張曜啟行後甯夏需兵填紮定安旣奏稱金運昌一軍難以輕動應如何派隊扼紮俾免疏虞之處著該將軍妥籌具奏阿拉善旗有賊匪竄擾是否白彥虎一股

見既竄向阿畢爾米特地方著定安督飭防軍會同蒙兵認真截擊並著知照張曜撥隊協力兜剿以免蔓延另片奏請飭豫省撥解張曜駝隻銀兩等語前諭錢鼎銘於張曜一軍月餉外籌銀三萬兩備購駝隻迄今未據報解見在張曜統軍西進需駝甚亟著錢鼎銘將前次派撥銀三萬兩趕緊如數措解以應急需至每月餵養駝隻及駝夫工食等項需費甚鉅著鮑源深飭令河東道自本年四月起每月籌撥銀五千兩交太原駐紮嵩武軍轉運局徑解張曜軍營以資接濟河南餉項未到以前張曜所需駝隻仍著定安趕緊籌款墊辦以便張曜兼程前進俟河南餉到再行撥還該將軍當以大局爲重不得稍涉推諉儻有貽誤定惟該將軍是問將此由六百里各諭令知之○己巳左宗棠奏陳湜傳飭巴燕戎格城鄉呈繳馬械准其自新數日之間陸續繳到叉子槍約二

千桿馬約一千三四百匹巴燕戎界連循化地分八工均係撒拉
回族每工約戶口數千其五工惟木胡隆一工馬械較多各莊尙
知畏威呈繳獨距城六十里之青科莊回族雖自稱限期呈繳然
暗中牽連藏匿屢催罔應陳湜稔其爲撒拉悍回平時卽遠出擾
掠商旅素稱劇盜兇橫尤甚者不乘威創之終貽後患二十八日
整旅前進道員劉錦棠亦率隊來會青科悍回竟敢空莊出拒守
隘放槍官軍突前擒斬數名賊始翻山而逸遂進兵駐紮青科次
日陳湜傳飭各工各莊回族不准容留青科一回並聲言將青科
田屋給各良回該回聞之乃於三月初二日歸莊投誠聽候察辦
陳湜當將著名回匪馬乙麻馬米力冶主麻等五十六名就莊聯
戮梟首以徇初三日派提督張仲春都司馬占鼐勒繳該處及附
近各莊馬械拆毀各莊礮樓宥其馴者安業如故青科一莊遂平

乃接辦卡勒岡工十三莊撫事查卡勒十三莊惟三莊馴順其十莊隱匿槍械各回目亦屢傳不到初四日楊芳桂往查該十莊鳴槍抗拒又大胡卡勒兩工交界東山內亦多藏匿馬械初五早張仲春同所部仁營營官總兵劉厚福往查劉厚福率弁勇數十人獨出一路途中被伏賊暗槍中傷殞於陣前亡弁勇數名初七早陳湜派提督劉明燈前往助剿馬占鼐亦率隊入山窮按該逆抗拒如故陳湜以該逆怙惡逞兇亟應痛剿卽商派沈玉遂陳廣發鄧榮佳等帶後路隊伍分支急追其馴順三莊給以良民旗令植門首禁止官軍不得擅入專攻十莊五日已破其六莊斬悍賊三百餘名帶傷者不計其數然每破一莊賊拚死抗拒官軍中槍傷亡者共數十人馬占鼐所帶回勇亦傷亡三十餘人其餘四莊遂哀懇求撫卡勒東爲甘都工自陳不敢助逆卡勒甘都之河對岸

舊爲循化上四工撒拉回族所居上四工素懷反側與下四工仇隙本深至是暗煽卡勒甘都中匪回並挾制良回希圖發動軍功馬永瑞自循化下四工來稱上四工內除人家工外均議糾眾滋擾下四工則願勦賊自效陳湜連日調度進勦十五日上四工內街子蘇治河沿三工回眾已渡河者果耀隊於卡勒工地十六日復分三路圖犯官軍營壘沈玉遂等飭各營列隊山頭自率數十騎誘賊飭後路各營偃旗潛伏山溝待之賊果糾眾來撲沈玉遂左膊被槍子洞穿仍裹創誘敵賊以官軍勢單翻山湧進忽伏兵揚旗突起四面衝截賊遂大敗官軍追奔十餘里立斃悍賊百餘名並奪其叉子槍賊之帶傷者無算均滾滾四散是日下四工頭目韓老大攻街子等工巢穴亦有擒斬十七至二十一二等日劉錦棠遣西甯鎮總兵何作霖率湘軍四營及撫回崔偉馬隊二百

騎到戎助破卡勒餘莊按誅兇逆餘同哀懇免勦並將馬械繳盡
街子等工頭目亦乞先繳又槍刀矛各一千五百件容俟縛獻醜
類盡繳馬械陳湜見駐甘都工河岸俟諸事妥畢再過河赴循化
次第辦理臣維該逆回族均撒拉一種生性獷野兒時卽操習叉
子槍技最精練平時較獵能於百步之外取飛鳥百不失一所居
依山瀕河地勢險惡乾隆中檄調隨征金川番族及石峯堡逆回
官兵恃爲軍鋒猛鷲可想嗣仍屢次擾邊官軍疊次進勦皆未能
痛加創艾率於巴燕戎循化邊界耀兵而還該回族自恃地險眾
悍時與漢番構衅弄兵益無畏忌官軍至則詭詞求撫旋復殺掠
如故爲隴省邊患者近百年矣茲乘河湟底定後深入其阻大加
搜薙冀可潛銷隱匿一靖邊陲陳湜辦理此事於回莊中稍明順
逆者曲加撫慰並嚴禁弁丁毋令稍有擾累其桀驁者則必痛加

勦辦倖識兵威總期恪遵諭旨分別勦撫以規永久臣宗棠亟飭陳湜沈玉遂等苦心分明毋枉毋縱以持情法之平此時多費一分心力將來卽免一分衅端不敢草率從事致煩聖厯又奏陝回白彥虎由西甯狂竄官軍截擊疊獲勝仗業於二月二十九日附摺陳明查二月初七日降補參將楊世俊偵知該逆零騎擾及扁都口關門等處初八早飛派馬步隊於口外扼截賊果蠢擁而來楊世俊直前迎戰賊恃眾而囂爭先馳突鏖戰四時之久斃執旗悍賊數名賊敗走官軍由南山鄉追至費家寨賊復返撲官軍鼓銳奮擊陣斬二百餘名槍礮轟斃者狼藉於地生擒賊目領員藍添紅一名悍賊四名賊由山岔紛紛亂竄是夜擾及洪水西北訊據擒賊供稱此股係白彥虎馬長順余老虎並西甯蘇家堡二司付等因畏罪不敢就撫暗糾西甯西北兩川及大通永安敗匪

合股北竄初九日探報賊竄山丹屬之下四旗楊世俊卽率馬步四營並洪水紳士軍功王應庚等率練勇百名分爲三路迅往掩襲黎明行抵該處賊瞥見卽遁楊世俊等及其尾隊頗有擒斬而賊竄甚速無心戀戰日暮已竄至東樂地方楊世俊料其必由甘州北竄初十日黎明取道石岡墩一帶直下甘州以圖攔擊詎賊已於是日竄甘城十餘里之梁家堡署甘肅提督楊占鼐統帶信字營提督張慶雲及信字營營官副將王節文各率隊馳往正值該逆分股渡河隊伍散亂張慶雲率馬隊迎頭奮擊楊占鼐率步隊隨後策應賊倉卒不知所措驚惶四散官軍乘勢掩殺斃賊十餘名生擒一名餘賊仍敗過河北而去初更時楊世俊馳至探報賊踞距甘城三十里之紅沙窩一帶十一日五鼓官軍分三路前進張慶雲爲右路楊世俊爲左路楊占鼐及署甘涼道蕭宗幹率

親兵爲策應行十餘里馬步賊五六百奔突而至官軍槍礮環施斃賊十餘名賊遽敗走楊世俊以前面必有巨股接應非進與決戰不能痛挫其鋒因與各軍整隊逐之白逆果憤前賊之敗親率死黨前來拚闕勢甚兇猛官軍聯爲方陣四面接戰乘銳衝突自辰至申官軍屹立不動俟賊勢稍懈乃四面包鈔而前槍轟矛刺賊敗而走共計斃賊百數十名生擒悍賊四名十四日賊數十騎馳突城外去而復返楊世俊等知其有詐派隊按其伏逆旋即敗去十三夜賊已西竄楊世俊張慶雲及甘提中營參將陶世貴疾追之次日及之於撫彝廳屬之鴨子渠板橋賊正圍攻民堡官軍乘其不備急擊之斃賊數十名生擒十餘名賊眾三千餘回頭死拒官軍張左右翼擊之仍不少退楊世俊等揮軍陷陣斃悍賊十餘名賊始潰走官軍追殺數里共計斃賊百餘名生擒十一名十

五日賊由撫彝竄往高臺焚燒搶掠逼近城垣經城上槍礮轟擊敗去是夜踞距城二里許之下河沿又河南竄來一股與之會合踞鎮夷西山寺維時提督徐占彪慮後路運道梗塞亦派提督陶生林副將桂錫楨參將馮桂增等馳至賊見前途有備折而西趨楊世俊詢賊中逃出難民知河南一股係肅城遣迎白逆入城者肅城之賊知徐軍分隊遠出營壘必虛是夜賊出隊四五百圍攻官軍營壘徐占彪先已分路設伏賊至伏兵齊起被圍之壘亦開壁迎敵前後夾攻斃賊十餘名賊退墩下廢牆內墩上火彈齊拋復燒斃賊數十名賊敗入城十八日白逆竄擾毛目雙樹屯一帶民莊連陷十餘堡是日肅城南稍門亦出步賊千餘伏城壕內徐占彪令各軍嚴防衝突靜以待之頃刻賊由壕內躍出徐占彪督隊迎擊槍礮火彈並發斃賊目二名悍賊數十名賊敗退各官軍

復三面鈔來賊亦分股死鬪逾三時之久官軍衝入賊陣賊大亂敗入壕溝官軍乘勝衝殺斃悍賊數十名南稍門復出步賊來援徐占彪飭守備陳文英以後膛開花礮向賊叢轟放四十餘礮斃賊甚多時金順亦親率隊會剿兩股賊均縮退入城據擒賊供稱上年僞元帥馬得鎮赴西甯求援前夜偷越入城與馬四商議白逆等擬先將眷屬安置毛目北山內親率大隊赴肅應城逆之援毛目爲高臺縣丞分駐之所逆意圖陷此城以便安置逆眷十九二十等日白逆攻毛目城甚急架梯掘牆蠶擁上撲經縣丞李彭把總楊春督率紳民固守滾石槍礮下擊斃賊約百餘名並斃逆目一名賊仍未退二十三日陶生林等與金順所派馬隊及成祿畱防高臺馬隊自肅馳至出賊不意斃悍賊百餘名立解城圍追賊至二十里外又擊斃馬賊百餘名生擒逆目二名小頭目二十

餘名奪獲馬械無算二十四五兩日復敗賊於白柳灣萬年渠官軍乘其渡河西竄復殲斃多名二十六日賊竄金塔北屬牛頭灣楊世俊先已取道斜出該處爲攔頭截擊之計是日伏隊於三塘壩各要隘二十七日辰刻賊騎千餘攻莊擄掠官軍伏起猛擊賊遽狂奔官軍追擊十餘里斬獲頗多二十八日賊大股圍至楊世俊飭提督高登玉高月桂總兵馬有才鄒金本等三路分剿槍斃轟斃多賊復直前奮擊短兵相接立斬悍賊十餘名生擒七名時陶生林金順各軍先後會合三面攻剿復斃賊百餘名據擒賊供稱白逆右膀已被礮子中傷矣賊連日竄踞肅城四十里之野麻灣徐占彪方慮兵力難於分布適陶生林楊世俊等均已繞出賊前迎敵三月初六日白逆全股攜帶眷屬竄踞肅城三十里之塔爾灣廢堡卽肅逆馬四舊巢前經徐占彪攻破者也初七日辰刻

城賊開前堵築之大南門出賊二千餘直撲官軍長壕徐占彪率隊衝擊商調各軍及肅州鎮章洪勝安肅道史念祖派來護勇憑壕抵禦施放洋礮並放後膛礮四十餘響斃賊甚多賊惶亂不能成列正攻擊開白逆馬步三四千分五股由塔爾灣鈔來一撲參將方友升營壘一撲參將武朝聘營壘餘三股分撲各營長壕徐占彪調陶生林總兵齊懷松參將秦玉盛從九徐鹿鳴等由西鈔擊楊世俊提督金慶元總兵戴洪勝黃祖福等由東北鈔擊徐占彪親自率隊由中路衝擊賊殊死戰金順亦督隊前來會剿鏖戰三時賊全股敗潰徐占彪揮軍趕殺十餘里奪獲白逆方紅旗二桿前鋒花旗五桿小旗十九桿生擒二十八名斃賊四百餘名肅城之賊見白逆大敗始鼠竄入城初八日賊千餘由南門出撲長壕官軍憑壕連施槍礮徐占彪率隊從水卡衝出金順督所部馳

赴南門策應又調後膛礮連放二十餘礮賊紛紛倒仆仍敗潰入城賊前隊各帶草束後隊各帶鋤鉞意在填壕以迎援賊不虞疊次被創志不得逞也訊據擒賊供稱白逆將於初九日五更來撲長壕徐占彪與諸將商議俟援賊來而戰莫如先擊其虛是夜三更分派各營嚴守長壕防城賊出竄一面率馬步分三路別由小路銜枚疾進直擣援賊巢穴行距塔爾灣三四里探報該逆二千已由大路赴援肅城矣徐占彪飭各路取齊速進天明抵塔爾灣賊始驚覺狂呼亂竄老幼婦女伏地號呼人聲鼎沸徐占彪令毋殺賊眷見強壯者則砍之立破其堡賊向南山狂竄官軍躡追十餘里共斃賊四五百名生擒二百餘名訊據生賊供稱已絕糧三日惟擇生畜疲頓者宰以充飢故行不能速是時援賊已抵城南南門內亦出賊千餘夾攻長壕各營分途迎敵連環施放槍礮

援賊屢卻屢前正相持閒忽賊中隊伍自亂悉撥馬返奔蓋聞官軍已破塔爾灣急顧巢穴也城賊見援賊掣轉亦縮退城壕適徐占彪等追賊收隊行過塔爾灣十餘里見援賊奔回前署肅州鎮總兵王子龍提督李登第都司劉芳海千總李道修等遽策馬衝入賊隊各手刃數賊中槍殞命徐占彪飭各營整隊繼進陣斬賊二百餘名適金順飭所部馬步馳同會剿賊卽紛紛潰竄官軍回營見城賊未退復乘勝越壕痛剿賊始敗退初十日白逆分股由南山竄文殊山官軍追之生擒二十餘名收回婦女百餘名十一日徐占彪楊世俊商定金軍於十二日仍剿援賊黎明三路鈔去距賊二里許賊出步隊五六百列堡外拒戰官軍先投其伏伏賊先敗官軍勇氣百倍所向披靡飢疲之眾有竄南山者有竄關外大罩灘黑山峽等處者官軍追剿出關之賊二十餘里斃賊一百

餘名生擒十餘名收隊回營留桂錫楨馮桂增兩營馬隊駐關防
堵是夜三更援賊二司付馬步六七百復來衝撲長壕官軍扼壕
堵之賊下馬越壕官軍前後夾擊奪獲賊馬三十餘匹擒斬三百
餘名賊由東湖灘橫逸衝至金順所部各營壕邊復經金順殲斃
百餘名此股漏網者無幾矣十六日三更城賊千餘頭裹白巾出
撲東湖官軍長壕並攻營卡徐占彪由北而南楊世俊由南而北
截之時賊已有數百名突過長壕遇官軍包鈔夾擊陣斬白旗悍
賊數十名槍斃轟斃尤多擒賊十餘名餘賊仍滾溝縮入城中據
擒賊供稱城賊自援逆疊敗後益惶懼不知所爲前由關外來援
之賊已亡傷過半彼此怨恨急思棄城逃竄恨不能潰出重圍臣
維白彥虎等逆由西甯偷竄據劉錦棠稟報不過二三千人途次
凍餓僵斃不少續據署大通縣稟報賊數約及四千蓋西甯回目

馬壯大通回目馬正清等竄併入夥並沿途裹脅漢回民人頗多也迨經節節截剿賊勢日衰其得至肅州應城賊之援者據前敵各軍稟報初不過三四千續報二三千雖均約略之詞然賊眾屢敗逐漸減少是其明證見據徐占彪報援賊之散竄南山者數百當卽大通西甯之賊楊世俊報狂竄出關得至大罕灘黑山峽者人數不多又探報賊首白彥虎於毛目之戰右臂已被槍傷故疊次援賊來犯未見該逆領隊其偽副帥馬占魁及大通賊目二司付均已陣斬此外陣斬各賊目非擒賊供指不能確悉其羈縻帶傷之賊目則擒賊亦未能確指也援賊已絕糧三日以馬騾充食出關以後則水草柴薪俱乏雖宰牲亦難生啖人馬餓斃亦多冀或免貽關外巨害臣見檄徐占彪將所收白逆裹脅之漢民數百名酌給賑糧分別安插其丁壯願隨營者准暫補各營卒伍缺額

其散竄南山各岔口者飭甘州各防營搜緝並咨商宋慶飭分駐甘州各營就近捕斬以絕根株其前敵各軍長圍密合士氣甚奮臣飭解餉銀軍火並攻堅火器均絡繹載塗如賊肯出城就戮則歲事可速縱使固匿不出亦當盡力攻剿速拔孤城不致久稽時日 上諭軍機大臣等巴燕戎城克復後陳湜飭令該處回族呈繳馬械並將青科莊悍回懲創以次戡定卡勒等莊見駐甘都工河岸俟循化上四工回族縛獻醜類盡繳馬械諸事辦妥再赴循化次第辦理卽著左宗棠等督飭陳湜認真籌畫懾以兵威撫其馴順以期一勞永逸綏靖邊陲白彥虎等逆由西甯出竄圖援肅州經楊世俊等軍探蹤截擊疊挫賊鋒該逆復與肅城踞賊夾撲圍城營壘經徐占彪等督軍擊退並襲破塔爾灣賊巢賊膽益寒紛紛潰竄見在白彥虎已被槍傷亟應乘此機勢迅速殲除其散

竄南山各岔口者左宗棠已飭甘州各防營搜緝並咨商宋慶飭令分駐各營就近捕斬想可淨絕根株至竄向大罕灘黑山峽之賊人數雖不甚多亦應一律追捕仍著該督飭派官軍探蹤剿擊悉數殲除毋畱餘孽肅賊無援必形窮蹙左宗棠當飭令徐占彪等盡力攻剿速拔孤城不得久稽時日將此由六百里各諭令知之○允左宗棠奏調前布倫托海辦事大臣李雲麟赴營差委○予甘肅陣亡總兵官劉厚福祭葬世職○辛未以瑞聯爲熱河都統調志和爲盛京戶部侍郎榮祿爲戶部左侍郎以訥仁爲工部右侍郎

由內閣學士遷

○癸酉諭軍機大臣等左都御史胡家玉奏江西

省額外加徵地丁銀兩請飭裁革一摺據稱江西省錢糧定例徵銀一兩隨徵耗銀一錢今每兩加徵銀四錢顯違定制請飭永遠裁革不得再立捐款公費名目等語各省地丁錢糧均有定額若

如該左都御史所奏是該省州縣於正額之外違例加徵民間受害何可勝言亟應速爲禁上著劉坤一嚴飭所屬州縣等恪遵定例不准絲毫浮收如查有私立捐款公費名目額外加徵者卽著嚴行參辦另片奏該省漕米一石折收銀一兩九錢除解部款外提充捐款公費及州縣辦公之用爲數已多復又分爲三限每限每石各加銀三錢全給州縣辦公深恐虛報收數徒飽私囊弊端不少請旨裁禁等語著劉坤一一併查明將應行裁革者速行禁止並著嚴飭各州縣認真辦理毋得稍有徇庇原摺片著鈔給閱看將此諭令知之○丙子 上詣 大高殿祈雨○諭內閣御史文明奏宦寺馳行越禮請旨嚴禁一摺據稱本月十三日祭祀禮成還宮之先突有眾太監騎馬爭馳自正陽門起擅走各門中洞並廝役亦俱騎馬由中路跟隨衝越儀仗直至午門外始行下馬

各門官兵並不向前攔阻請旨嚴禁等語乘輿出入凡扈從各官皆宜懷遵步行若如該御史所奏該太監等越禮馳行實屬不成事體亟應嚴行禁止著總管內務府大臣令總管太監嚴加約束嗣後該太監等當差出入皆當恪遵功令不准恣意妄行並嚴飭各門章京督率官兵等每遇乘輿出入各路如再有太監及廝役人等擅走御道不聽攔阻者立即稟明該管大臣奏請從嚴懲辦毋稍寬縱另片奏請將慎刑司所立鐵碑恭錄懸挂各處等語著管內務府大臣即將慎刑司門左鐵碑敬錄數通恭懸執事太監各處俾知有犯必懲以肅紀綱而昭炯戒